

樂志堂文集

樂志堂文續集卷二

南海 譚 瑩玉生撰

重刻輦鑑圖書後

昔有攜妾遠行織錦特貽夫壻從軍久別裁詩竟獻君王古今豔說仙才中外誰誇女表是卽吟同柳絮頌比椒花文辭兼該心形俱服足冠婦人之集誰編女史之箴若乃觀其著撰已極巧而窮工繹其詞章又陳規而起諷義皆重疊語必迴環嘉言足題闔德斯諒輦鑑圖者唐上元初南海女子作也迴風流水瓏玲四角之欄倚鳳垂龍匝匝千年之字言言協律敘端委以無由語

語離章析毫芒而極致應弦赴節四聲則三律均諧分  
風擘流兩字則中權各據雙枝雙葉銀纏翠厄之靈八  
面八方寫卦圖星之象且也意存比興用等箴銘如披  
德象之篇宛接文人之論先生望重隱者風宏訓誠實  
本聰明敘次尤憐清雅倘賡弋鳧之什誰賦翱翔卽占  
鳴鶴之爻恆令反覆鍾琰禮儀法度豈徒嘯詠之工班  
昭博學高才端由節行之美想其內集談深新粧咏罷  
或下從溫嶠或報有秦嘉本團圓而不破豈欲賣而題  
詩卽索寞以難忘誰相看而作畫蓮枝舊贈易喻分釵  
竹葉新裁甯徒製錦於是銀缸對寫牙管先書借玉尺

以量勾劃金針而鏤出蓉裳蕙帶左悅右箴寶月長懸  
織塵不著滌瑕盪垢乃方寸之無私灼往觀來庶毫釐  
之必鑒妍媸迴異端藉乎脩治表裏皆同實資乎磨瑩  
鉤心鬪角疊矩重規謝牽衫著釧之吟刪寫翠傳紅之  
韻十六句重羅八字幼婦才名百九言複作雙文大家  
讚頌足載聲於彤管甯遺懿於玉臺夫蔡女知琴竟爲  
胡婦魏宮留枕願適陳王謝道韞恆施素褥本恨王郎  
張麗華共擘采牋卻偕江令以至婉兒爲崔湜之朋秋  
孃原李錡之妾枇杷花下署才子以吟春楊柳梢頭約  
情人而待月魚元機之才思誰遣縱懷李清照之文章

同羞晚景類觀才藻絕鮮幽閑非無典美之詞敢說清  
芬之操若女子者瞻前顧後明禮閱詩往復纏綿箴規  
諷諭則雖香名靡泐軼事不傳愛其才者尤重其德焉  
有唐時曾爲王子安令狐慤士所稱雖嘗疊賞乎宗工  
仍未徧傳於士女值重脩乎職志爰再付乎雕鐫庶幾  
式此女宗不僅資乎姆訓珩璜有度璫珥無光照瞻照  
心宜家宜室事殊天寶詎侈十眉之圖望遜曲江此亦  
千秋之鑑

東還紀略書後

右東還紀略一卷與輪臺雜記兩書均春林史先生撰  
瑩與賢倩侯君謨孝廉誼託素交分居後輩道光丙戌  
值新疆之構釁知舊著而假觀顧未登李膺之高門參  
劉惔之末座也輪臺迥殊人海實盡天山紫塞雲黃金  
城月素風穴之狂風陡作雪山之積雪難消先生以鉤  
河摘洛之才宜建耀日熙天之績鬼神呵護閭巷謳思  
懋著循聲却雇重譴竟同還戍油然報國之忱永憶慈  
親早慰倚閭之望嶺隅簡札塞外輪蹄攜數十口之流  
亡閱二萬里之衝要還家最樂行路綦難仍越果子之

溝言辭木葉之戍浮萍漂寄苦筍平安侍阿母而彌歡  
願力農以沒世虎頭無恙鴻爪當留感破格之

恩深誌撫時之願切殆稍異於陸劍南之記入蜀郭功  
甫之記客杭矣哲嗣穆堂山長昆仲等並付廁氏而琬  
鐫當爲藝苑所珍祕孝廉雜著附刻遺書亦綴小詩輯  
刊總集復有光閼龍淵竊恐灰隨蠹簡惜老成之凋謝  
嘆文福之懸殊循覽二書倏經卅載宛鄰笛之再咽久  
人琴之俱亡已羨微雲之女壻論撰亦倚馬萬言知明  
月之前身還往第驂鸞一笑

桂丹盟觀察養浩齋集書後

稱詩專師李唐兼祖漢魏果導源於周雅復取逕於楚騷俯視齊梁仰窺陶謝誰入清翁吟社竊同野史名亭合初盛晚諸賢迄蘇黃而靡盡與袁蔣趙齊列竝王朱而不慙鳳跼鸞吟雕爭鼇抃捧敦槃於白雪馳書幣於絳雲作者傾心才人低首一集之流聞易遍千春之名著翕然足演迪乎斯文亦尋恆之餘事若今讀桂丹盟先生養浩齋集若干卷續集若干卷而竊嘆其前無古人後無來者殆四朝之詩史洵一代之詞宗也惟先生忠孝性成英雄材裕合爲宰相文章原似敬輿纔作



秀才責任居然小范政績召杜勲名陶劉詠懷誰埒步  
兵傷亂偏同太尉定許稷契業謂義皇轉轂靡常磨盾  
素豫管樂誰比夙工梁甫之吟開寶卽殊厓念汾陽之  
輩詆新亭之對泣豪宕可知盼開府以重來指揮卽定  
澄清有願遭際何如第思保障海隅原欲掃除天下其  
詩也似太羹元酒原美玉良金氣志如神文史足用耿  
介壹鬱古直悲涼李紳憫農韓愈薦士存住山之本色  
發思古之幽情聞關琴劍而倦游迷悶簿書而卽寓邑  
鮮述亡之慘仍媿俸錢自慙居處之崇森羅畫戟宛如  
鄭俠一拂圖繪流民直埒劉蕡萬言第論時局誠通衡

嶽神相感而特靈惠洽道州賊詎憐而輒退宋蘭臺自  
作九辯靳尙何誅杜少陵實賦八哀次律誰護長江鳴  
咽逝者如斯大樹飄零將軍乃故桃花源杳細柳營摧  
險厯彭衙誅均汧督鉅平鈴閣小杜鬢絲夙知江左夷  
吾敢笑太原降將謝文靖去思原切隸北甘棠韓忠獻  
晚節彌香圃存黃鞠睢陽爲厲而殺賊是所甘心令尹  
紆難而毀家自然流涕南澗之宅仍卜北府之兵不來  
宛聆口碑恍閱年譜河山如故便抵封章館閣云誰藉  
撰紀傳忠良翊 聖仕止匡時祇當代曹劉實再生南  
董已以例疎鐘清磬第仿謬然古音素練輕縑自詡鬱

爲時望百年萬里之作露初星晚之章迴不睥耳至謂  
飄然無敵行氣如虹理趣不凡寄愁與月字字可尋根  
據言言輒吐光芒飛動鬱盤清轉華妙一空依傍不主  
故常對工而特奇韻險以彌穩無庸贅已學使漁莊先  
生合秉珠衡曾侍絳幄遠貽細帙同付琬鑄恐帝虎之  
或訛特襄讐校笑妃豨之苦學彌願推崇知一心殆可  
同天嘆五體竝當投地盥薇恪誦永矢弗諼已吳棲山  
遠輶福命同鄉均具熱腸張仲治亦號敢言竝世當銷  
傲骨 御屏名在第寫十聯之詩記室文傳緣附一品  
之集

太華山人詩存書後

夫傳編循吏文苑誰兼錄檢先賢詩家特妙若乃口碑  
猶在遽同騎省之閒居手筆爭傳不減春陵之舊作如  
我王受之先生太華山人詩存者洵無媿已惟先生降  
祥繡被絕盛烏衣張氏則才擅景陽賈家則最推偉節  
夙嫻論撰兼善詩歌乃製錦於八閩遞鳴弦於六縣誰  
治單父星月容閒如令灌壇風雨不作洊陞通守普建  
生祠遺愛翕然循聲綽著諭蒙之作剴切詳明讞獄之  
辭纏綿悱惻延禧復古悅芹藻之俱馨課雨量晴卜桑  
麻之如繡讀其詩如隨觀稼宛聽哦松若覩栽花仍哀

拔薤者歟尋而解組歸來導輿至樂求雀炙供鹿脩紫  
綬金章牙籤錦帙松篁三逕桃李一園錦里則耆舊同  
編圭塘則弟兄有集周益公之未老詩酒相娛姚武功  
之獨閒篇什漸富談多稼穡訪到荔蘿涼蟾夕窺癯鶴  
晝警譜鬱輪袍而誰屑吟詩分詠輞川撰耒耜經而靡  
遑叢書合署笠澤竊謂詩關根柢尤重性情故陶謝齊  
稱而靖節之風徽特遠韋柳並舉而蘇州之識解彌超  
官比巴東句獨稱乎野渡人希君復歸久住乎孤山心  
迹雙清蘿袞一致邊幅匪狹用如素練輕縑寶光淵然  
神似渾金璞玉政侔閑道原可告天直言韻用端明宛

然度嶺諸作

詩多用蘇韻者

亭猶野史枕卽游仙村原惟遍桃

花官廨猶存柏樹行簡原異理趣不凡騷人之文耿介  
壹鬱雅材舊著潔淨精微詩卷長留文外獨絕固不僅  
落霞秋水之豔節鉞推襟微雲疎雨之幽臺省閣筆已  
鄭小谷比部序云不求工而自工又云古體工於近體  
五言工於七言諒哉諒哉季弟兩粵都轉靜山先生小  
試和羹之事珍藏屬藁所遺青簡尙新素琴久輟望如  
小宋豔傳紅杏之詞愛甚阿連永懷春草之什特付手  
民委瑩讐校合掌讚歎拊心皈依敢學鍾嶸之品詩難  
詣揚雲而問字官職與詩名並重白傅安知文章與政

事不殊子昂合鑄護須神物不徒鐵鎖一聯詣異鬼才  
仍愛錦囊什襲詎必蔡邕而特賞琴匪焦桐尙期李父  
之合編集名花萼

鄭小谷識字耕田夫小照跋書後

瑩南陽舊作云不徒人物無諸葛名士躬耕近有誰若  
我鄭比部小谷先生者殆兼之矣乃今讀所撰識字耕  
田夫小照跋而不禁喟然長太息也夫謝文靖青山墅  
睹裴中令綠野堂開白太傅之風流敘詳粟廩辛幼安  
之曠達號取稼軒偶寓性情無勞比例若乃釋簪裾而  
返里荷蓑笠以還山卜宅柴桑買田陽羨第結月泉之  
社迴殊山澤之癯詩仿石湖便擬村田之樂府集如松  
雪遍題耕織之畫圖耳先生則目窮四部手訂萬籤其  
人在儒林文苑之間此事卽無逸幽風所載劉祥道之



鞠獄憶尙欵歐陽子之歸田哀然集錄劇松閉戶知  
稼稱翁兒寬帶經旣鋤禾而輒讀高鳳握卷詎流麥而  
不知家足稻梁日事鉛槧居然二頃奚止半農子真甘  
作隱淪漁仲業成通志考經籍原如檢討烟雨歸耕營  
祠堂合祖司農溪山如畫洵足樂也卽謂往來楚水吳  
山教授鷺湖鹿洞離家匪遠浹歲仍還二月催耕分秧  
水碧一年生計刈稻雲黃王丹或載酒肴樊須仍學稼  
圃炊黍蒸藜之餉烹羊炮羔所歌園訝廣川之窺書等  
羽陵之曝芳草未歇懸知司馬之倦游良苗懷新時見  
泉明之語妙而乃妖星颺閃毒霧瀾漫豺虎縱橫鯨鯢

偃蹇兼年累載露蔓煙榛棘寺槐宮殤魂鬼火杜工部  
廢畦除架牢落可知王摩詰經卷繩牀遷流靡定但記  
仇池之穴遑問武陵之津僑居羊城永憶象郡梁鴻賃  
廡王粲登樓有問字之生徒獨指困之朋舊天荒地老  
草成帶而無書水遠山長松斲脾而誰寫田餘舊硯同  
編耒耜之經人記亡書重錄巾箱之本稼穡惟寶仍愛  
茅容劇談竹木盡枯定如倪瓚所畫鷗邊憤外庸知幾  
日朝班豚柵雞栖也作一場春夢良可慨已然而門成  
都市人謂羲皇轉眼 承平置身蘿袞清望羣推李郭  
盛名終學顧

亭

閻

潛

如此風神讀離騷便稱名士果誰

伯仲吟梁甫竊比武侯不可企已至如瑩者癡同竹屋  
所語惠鮮草堂之貲有田不歸坡老早盟江水何書可  
讀廣文但酌檐花且愧書廚安問田業三復此冊彌用  
愴懷

汪芙生秋城夜角圖書後

同治改元歲次壬戌冬十二月芙生汪君囑題其秋城  
夜角圖

僕

畏友也受而讀之撫時感事而不能無言矣

慨自辛丑定邊甲寅盪寇以迄丙辰貨廡丁巳移居避  
地安之園城依舊連營度度畫角聲聲哀同羌笛之吹  
健兒果盡悲似胡笳之奏戰骨彌寒容易鎖心原難習  
膽固事權之不屬亦才操之迴殊耳惟君飲飛斬蛟北  
平射虎有翦雪裁雲之作本鉤河摘洛之才禰衡之搥  
鼓特精安道之碎琴誰料李供奉桃花潭畔早識汪倫  
周亞夫細柳營中廼得劇孟時五嚮亭太守宰曲紅之

善地懋著循聲愛慘綠之風裁練知兵事值黃巾之肆  
擾抵玉壁以長圍賊匪夜郎城猶黑子桑麻被野草木  
皆兵曙啼白頂之烏夜秣黃鵠之馬吹篴逃矣劉琨之  
清嘯夷然擲笛不來馬援之倚歌誰和君乃撫弦登陣  
磨劍殺賊公如傅燮身世安知余詎郝超喜怒宜爾軍  
儲早辦戰具同脩刁斗倍嚴微幟誰換將軍揖客玉帳  
牙旗戎府詩仙山樓粉堞祖逖憂國舞待聞雞曲端馭  
軍點勞縱鴿時也月華端正霜信綿濃旅燕未辭塞鴻  
無限一聲鳴軋百感中來譜新樂府而未遑夢古戰場  
而欲弔省識兵心之苦能令士氣之揚燈火微明鈴柝

相答三峽聽五更之轉星辰動搖萬方同一哭之悲風  
露淒咽海隅記室如聞關隴之吟吾輩從戎獨說江山  
之助雙鳴兮似語三疊兮銷魂閒身仍類白鷗俠骨早  
吞青犢卒使韶臺之石永莫相江之波不興巷有絃歌  
署無兵檄樓仍風度蕪城均軟繡之街堂仿如瞻連榻  
比聯吟之社魯連豪士排大難以飄然孟嘉參軍作蠻  
語而誰屑香爐玉屏之遠梓鼓不鳴珠厓銅柱之難桀  
鶴同去斯圖之繪夫豈偶然今日者中原多故海水橫  
飛鯨吼雕爭猿吟鶴唳聚落盟心而懸鼓官總習行英  
雄彈淚以吹簫市難乞食倘大樹下之助名人如太守

紅蓮幕所企羨各比美生氣祿全消光華復旦 太平  
可卜下武其興格三苗斬孤竹中和頌擬封禪文傳豈  
異人任若夫征虜雅歌汾陽伎樂銅琶鐵拍梗概原類  
端明豪竹哀絲陶寫或如文靖亦借閒之韻事諒足副  
所深期也至謂希範裁嚴脩期磨盾陶威公之作答孔  
少府之讀書均屬外篇無庸贅述

許九霞同年秋江詩畫冊書後

我九霞同年以鉤河摘洛之才蕩海彝嶽之槩宜其雅  
頌 皇迹丹青 帝猷譽擅無雙官居第一玉堂恩寵  
賞花釣魚鈴閣蕭閑對竹思鶴唯修五鳳去住蓬壺逕  
策六鼇廓清溟渤卽不然而譜傳理縣詩撰諭蒙求勾  
漏令以如仙賦春陵行而退賊馴魯恭之雉栽潘岳之  
花籬菊笑人江鷗識汝夢故鄉之山水採絕徼之芳馨  
吾兼吏隱之名吟同楚些地有湖山之美圖繪幽風至  
足樂也而乃辭蟬捨冕作保障於鄉閭依然載鶴攜琴  
播風謠於灘瀨韶臺尺劍瀆水歸艤寄遐想於林皋託



深情於花鳥撫時感事假日銷憂以咸豐十一年秋九月由扶胥北旋成秋江詩畫冊焉詩共若干首仙才遠紹乎太白鄉風恪守乎曲紅沈鬱蒼涼清轉華妙畫凡八幀北苑遺法仍參極筆於三王南田寫生如仿祕藏於九禁嗟乎同年顧僅欲以詩畫傳哉際此華裔稍安高涼不靖中原多難全粵可虞能祈塞將之靈二禺偕隱果遂向平之願五嶽同游逕漱石而枕流盍乘風而破浪嗟嗟百鳥啁啾孤花搖落石棧猶存廢壘花阡曾作戰場聞鳴雁而遍開秋光點綴觀打魚而竊痛江景蕭森豔庾蘭成之年華含香矯翼抱杜拾遺之忠憤

濺淚驚心三逕誰資業比陶潛之歸去衆山皆響真如

宗炳之臥游錄著澄清庶直同乎丞相

菊坡

集編欵乃

元許

可用昆仲著有圭塘欵乃集

非所望於君家輒貢迂言便作左券布

帆無恙旣折柳而停橈詩卷長留仍坐花而奠爵脩期  
未老先草破賊之檄文文正交推自擬游山之錄敘

鄭小谷藏顧亭林墨蹟書後

亭林先生學洞天人情纏墳典開來繼往絕後超前湛  
甘泉格物之通原慙其篤實邱瓊臺衍義之補總媿其  
精深詎如豆之合黃豈是丹而非素絕無成見實本虛  
心購專集於曲紅缺兩序而兼錄謹嚴縝密飛動鬱盤  
宛然虞褚之典型畧具鍾王之法度端非信手夫豈慙  
心我

朝碩學好詆前明曾非莊景之迂盡如楊慎之駁原難  
低首殆鮮完膚矧以碧玉派流類同禪悅散錢學問端  
異史才先生泛覽流觀兼收並蓄目曾周翫手自補治

別寄津梁之遐想先除門戶之結習轉因藏弄足概生平已小谷比部偶獲其書另裝此冊盥薇展對屬草題還慰蘭茝之微忱記榆枌之佳話至謂道腴耽味文筆兼爛忘漢宋之町畦臻杜韓之闕奧曲紅勳閣先生自遜之曲紅辭翰先生當儷之推初盛文章弁冕辦香宜逮嶺南覓郡國利病圖編手蹟仍存浙右

許九霞同年藏戴文節山水長卷書後

嘗聞戴文節殉難時賦詩有云撒手白雲堆裏去從今  
不願到人間乃今讀九霞同年所藏文節山水長卷而  
益嘆其本具英雄之識特深仙佛之緣也觀其靈參造  
化思鬱風雲著墨偏濃捫紙欲濕興酣落筆五嶽俱搖  
道阻回帆三山復到早悟浮沈人海原比蜃樓洵宜去  
住仙山先辭鳳闕迨騎箕尾逕返龍天誰豔吉光片  
羽之留殆如陳寶赤刀之貴而乃松院錫飛蘭亭帖賺  
偏落彭宣之手合招正則之魂僑國琴同司農笏似嗟  
嗟色相本空光靈不沫別饒生趣湧現莊嚴各有來因

游行自在衣苔帶藻梅山禹廟之間雜荔薦蔬香爐玉  
屏之勝勵竹柏之才操悅隍澗之蕭閑瞻仰煙霞光華  
日月廿年舊事披圖卻憶徐熙亡友徐鐵孫觀察歲乙卯殉難浙西先於壬寅  
會以所作墨梅畫冊一代盛名傳畫轉憐孟頫  
遠貽遭亂竟亡之也

江曉帆中丞遺詩後序

夫吉甫作誦清風穆如姬公遽歸零雨不復碧雞金馬  
咸知特出之才銅柱珠厓賸見留題之作體原臺閣典  
裁定嬾常楊助有江山名位合同燕許文傳驅鰐韓昌  
黎之政績可知說喻捕蛇柳子厚之遭逢略勝比韓稚  
珪之節操三逕晚香嘆蘇內翰之生平一場春夢此伏  
讀我大中丞曉帆江公夢甦齋詩鈔暨海上寓公草而  
不禁喟然太息也惟公虞陞皋夔漢廷馮鄧誕青蓮之  
故里精降長庚豔紅杏之香名材推鼎甲譽稱懷橘孝  
感足徵宴錫探花科名不愧殿前作賦不勞狗監

而

夙知江左衡文殆留鸞掖之舊價星軺偶駐志桂海之  
虞衡水鏡高懸訪襄陽之耆舊筆生花而入夢封比醴  
陵疏焚草而輸忱宅鄰工部思戀 闕而辭 朝用當  
官而守惠作一方之保障仍築堅城奠五管之流亡藉  
殲狡寇願寇恂之永借期黃霸之重來頌劉寵之廉能  
祝韋皋之壽考拊黎毗於瀕海兵備雷瓊裕財賦於度  
支使轉鹽鐵事煩陳臬謫獄欵歛任鉅分藩得人審慎  
中興方伯羣推荀羨之年新建撫軍宜有桶岡之捷望  
隆督粵共冀韓雍論著徙戎誰知江統願以獨櫓不靖



攝篆兼司宜峻蠻防遠里吏議自分角巾東第未遑徒  
步南岡橫海待籌歸田許賦遂乃怡情篇什寄意謳歆  
臣本布衣地銷金甲陸龜蒙之去住茶竈筆牀王摩詰  
之生涯藥爐經卷或嘔心乃就貯合錦囊或叉手輒成  
催勞銅鉢玉宇瓊樓之句終是愛

君霜松雪竹之篇偶來呈佛

公屢游譙吟咏於長壽寺半帆

豈必和陶

之詠從無弔屈之文性情直是古人胸次居然達者爰  
搜舊作並列新詩遍囑心交以品評統付手民而剞劂  
其詩也風流自賞理趣不凡近敵王朱遠師顏謝或競  
書團扇或曾奪錦袍閒僧宜籠以碧紗吟社當賚之金

爵降幡鏤鎖實弔古之英篇疎雨微雲殆到秋之名筆  
良金美玉均嗣三唐之音素練輕縑閒沿兩宋之格元  
裕之之颯爽氣挾幽并高季迪之清真才高王李洵足  
傳已識兆白雞聲聞甲馬俟送嚴公歸櫬傳觀安石碎  
金退閒本繫安危英雄豈論成敗筆似脩期草檄集猶  
陸贄良方禪榻落花談兵小杜禊堂脩竹誓墓羲之故  
將軍倘念北平真名士誰如忠武瑩會聆聲歆實荷陶  
甄劍珮遑趨賤繪久曠刊詩讐校秀才偏憶老符餉序  
流聞先生深愧元晏知心魂之相守愛形迹之兩忘肅  
列頭銜詳書尾段廬曾謁

帝倘尙寫十聯之詩樓孰籌邊殆空存一品之集羊鉅  
平峴山遺愛傳待沈碑馬文淵武溪作歌和峇吹笛此  
卷長留天地他生猶記依稀懸知曠代才人且鑄聞仙  
之像不僅名山古刹珍藏白傅之詩

修省軒雜錄後序

滄海橫流狂瀾旣倒經籍箋疏宜束閣中聖賢箴銘誰  
眞座右槃盂在御圖牒罕存帛屨翛然針砭誰敢藉以  
披艱埽穢警瞶振聾者其惟仙釋二氏之書乎惟三教  
之同源與四部而齊轍誰聆棒喝業等卮言南華久似  
僻書東觀也均未見遂有傳聞各各流布家家慣見任  
謂於司空持贈乃徧於殘客柳下賈鼎子才誤書老生  
宜作常談元宰固當必讀感應編在至煩紅豆之箋陰  
騭文同彙成丹桂之籍鐘聞平旦燈續彌年依然綺合  
星稠屑論哀朽蟬斷乃今閱思忍氏所刊脩省軒雜錄

一書而竊歎其不主故常絕去雕飾如聞獅子之吼迴  
異兔園所編也溯自黑山構釁赤狄行災九服囂然萬  
邦多難剛際銀河清淺俄驚鐵颶縱橫水怒如山風鳴  
挾雨塔輪久墮屋瓦皆飛萬井仙靈千村鬼哭龍吟麟  
鬬鼉扑鵬爭擘山挽河盪海夷岳大木斯拔深谷爲陵  
雷避不聞煙埃欲暝單舟疊舸西舫東船捲飛蓬埽落  
葉時經彈指水遍沈骸死第輕於鴻毛葬可萃於魚腹  
豈非天心之示警者乎真靈位業宜大聲而疾呼衆生  
顓愚覺微言與奧義李蕭遠有言善惡書於史冊毀譽  
流於千載賞罰懸乎天道吉凶灼乎鬼神故可畏也所

謂言之者無罪聞之者足戒非歟或疑術同調象戲寓  
扶鸞託言優孟登場虞詆灌夫罵座竊謂天上游戲直  
心可知人間去來熱腸轉甚破除積習須礪劍鋒解脫  
沈疴待繹經卷拈花頓悟能使迦葉破顏灾梨遍貽不  
僅豐干饒舌厥旨如太羹元酒當味道腴所言如素練  
輕縑實濟時用似謠似諺殆沁心脾無古無今直抒胸  
臆棟梁無用恐松樹子之永憐寺院皆香證木犀禪而  
誰隱不持寸鐵臺省文章宛餽兼金神仙功德美人香  
草楚騷盡含忠履潔之辭羽獵長楊漢賦有憑虛亡是  
之作正不必究其說之果自純陽否耳斷楮零縑寫墨

梅數瓣銀鉤鐵畫入木版三分海闊天空鳥鳴花落度  
人仙訣壇非狡獪麻姑埽地家常我亦清涼行者心如  
棘刺尤須服而何假外求舌有蓮花偈誰傳而恆思自  
警水濁濯足宛聞孺子之作歌石頑點頭當解生公之  
說法竟令老死誰度鐵橋各有因緣定尋丹竈寸衷耿  
耿何知怒目低眉闔宇茫茫倘盡刮腸洗胃解憑老嫗  
真如白傳之詩望匪昌黎却善唐衢之哭

得印圖跋

戰觀昆陽文叔復漢家之璽釣非城下故人占尙父之  
璜讖紹金刀帝座之星辰誰犯珍同碧玉釣臺之風月  
脩然留貽先玉帶生傳竹如意碎興廢效金盤仙泣赤  
伏符銷我寄泉先生原是雲臺人物竊慕煙波釣徒迹  
異羊裘兆仍鵲印趙妾定屬宜主

龔定庵舍人得漢鳳紐白玉印文曰婕妤

妾趙定爲飛燕趙后物

周侯乃名惡夫所寶維賢伊人宛在投誰

作報瓊琚玉佩之辭拂有釣竿珊瑚碧樹之趣圖形物  
色同閼魚莊列傳隱淪誰爲贗鼎能書千木紙尾迴異  
洪厓幙頭菜竹永矢弗諠赤松未易輕擬緬想富春山



水心迹雙清遍徵華夏詩歌莊嚴一例相伴攜琴載鶴  
蕭閑也作漁謳何須捨冕辭蟬名氏同垂印史

罷合浦採珠議

合浦海中珠池七所瓊蚌之所孕育毒魚之所呵護島  
環回而洲平風翻攪而水沸鐵輪藤纜大絙小繩數年  
所蓄本非十世之資百里云遙恆餘一線之血苟念瘡  
痍亟思釐革已採珠之役漢唐無考

語本天下郡國利病書

然而

採珠致產乃獲故鄉之歸內珠入關幾令列女之坐貪  
穢者積以自入孟嘗到而始還猥多者限每不充陶璜  
表而特請黃武以珠官名郡貞觀以珠池改縣志稽萬  
震珠兒得而輒吞錄紀劉恂珠戶監而悉貢珠禁代嚴  
珠人實瘁已迫偽劉之代置媚川之都隸役二千人人

海五百尺籍商賈充府庫流清渠飾廣殿燔蕤之餘存  
四十六甕進獻所直給百五萬錢繩繫手而僅存石礎  
足而爭溺迨宋太祖開寶五年罷其卒爲靜江軍已太  
宗以英斷之姿席承平之業干戈靡息而俘馘屢獻螟  
蝗殆徧而庚癸不聞禍亂欲平珍奇漸至財旣豐於內  
藏貢已肇於容州

本紀太平興國二年容州初貢珠

獻花木之圖改雲

韶之部許封禪賜大酺侈心萌矣而乃禁採珠罷貢研  
復以雍熙元年十二月罷嶺南採珠場焉夫人君不大  
斬伐以偁山林無多畋漁以偁川澤絕縑綸之費除彫  
琢之飾以紙絹爲帳展以鐵木爲鞍勒當令一國紫衣

頓改何待十年黃金乃賤正不必廣設科防屢申鈐束

而不知期奢實易守樸良難始類絀華終誰飾儉彼洪

武七年罷廣東採珠

見黃泰泉廣東志

二十五年差內官於廣

東起取蠶戶採珠給與口糧者

見續文獻通考

獨非雄略之主

也歟哉史稱太宗服澣濯之衣毀奇巧之器卻女樂之

獻悟畋游之非至欲盡除天下田賦以紓民力有由然

也且合浦尤非可虐用其民者也鑿山爲城踐海爲池

西望天涯南登海角

天涯亭在欽州海角亭在廉郡南

閱十二年而未

已設十七砦而誰防採珠之人一而買珠之人十產珠

之地七而市珠之地且千原非捲握之珍舊說連述之

藪欲購非常之寶恐釀非常之變顧後之撫斯土者初無定制迄少專官始旣分司終仍總屬卽收其權於內監猶專其任於憲臣巡哨靡周干預誰効靡由申訴洊至交通排柵厰房竟成虛設網兜船隻豈必俱完或溺人五十餘得珠八十餘兩或用銀九千餘得珠四十餘兩危哉林富之言痛絕胡鼂之議留心民命者其永念開寶雍熙之初政也哉

寂惺齋主人圖像記

主人特拈寂惺兩字以觀道而卽以名齋羌無故實海

闊天空各有來因水流花放倩誰繪像穩坐蒲團云自

補圖定留丹竈本來面目端合住乎羅浮

蘭甫同年題句與主人有

羅浮之約

如此風神待徐脩乎仙佛倘憶趨翔廊閣畫省香

鑪卧理滇黔節樓羽檄鄴侯作相證煨芋之因緣新建

通禪豔征苗之勳績信三生之福命得半日之蕭閒韓

稚珪之功名節比黃菊張子房之建豎游訪赤松亦平

地之神仙本真靈之位業耳然而莊嚴七寶轉眼皆空

飛舞萬花著手同散主人者朝衫久脫塵網全拋清淨

空明堅牢鎖定杜工部青鞵布襪謝文靖散髻斜簪久  
要惟雪竹霜松相對祇清泉白石非儒釋道定置邱壑  
之中閱去來今自謂羲皇以上不喧不寂明月萬山不  
睹不聞飛瀑千丈蔬足果足餅鉢翛然風寒水寒琴筑  
互答鐘魚不設笙鶴無聲雙僮未解應門諸佛殆思入  
座無勞面壁安問寫經業早歸山偶然作畫屑談辟穀  
仍學拈花此中有人其實無我某山某水定爲二氏所  
居何代何年遍游五岳而返蓋主人自此遠矣瑩移愧  
北山游喜東墅端明白髮高臺忘記德雲靖節素心淨  
社難容靈運題長句而未學示珍圖而惘然劉郎前度

看花吳質。彌年伐桂。易作濠濮之想。深恐津梁之疲盟。  
白水而敢淪指。青山而同往生。生生世世。悟彈指之機緣。  
色色空空。算當頭之棒喝。主人爲誰。同里羅廉訪六湖  
先生也。



上蘇賡堂直搢牋

海水羣飛烽煙未熄切盼波恬塵靖海晏山藝舊雨縈  
懷慶雲在望恭惟名震華戎材兼揆奮裴中令灰心忍  
事身係安危諸葛亮抱膝長吟

帝知謹慎重寄宜超居外相誠効益彰大功定出於儒  
生懽呼相慶王新建盪平八寨經濟集編崔與之安撫  
三城澄清錄著瑩辱襄化導夙荷矜全敬伫鴻輝當隨  
燕賀特修燕稟略表葵忱伏乞鑒原仍希垂照韓稚圭  
位宜將相記撰錦堂馬伏波威懾蠻夷勲銘銅柱肅求  
鈞誨敬問鼎安卽頌升祺仍訊節喜不宣

貽鄭小谷賤

捧吟袂於春餘挂征帆而水遠憶五羊之久別寄雙鯉  
而偏遲幸同萍葉之隨波又睹荷花之繞岸比惟小谷  
先生吏部文章湖州風範馬季長夙精詁訓合擁絳帷  
管幼安何知亂離條然白帽振鄭鄉之絕學仿虞苑而  
註經道出羲皇門成都市懷鉛握槧棲原谷口之閒折  
藕浮瓜飲同河朔之醉伯眉沈學博遇君香市過我松  
園知忝素交代傳芳訊原嗟契闊深荷注存某忙猶汗  
馬默比枯蟬拙甚鵲鳩驚同蛺蝶竟杜門之無術縱開  
逕而能來今雨縈懷停雲載望聞儲藏之特富經兵燹

而靡遺業同星宿之羅胸任比煙雲之過眼謹付上近  
刻粵雅堂叢書一部初編二編共若干卷校真同於埽  
葉居定比於積薪略供泛覽流觀竊願兼收並蓄嗟嗟  
人如曾子久寓武城之居我亦蒼生仍冀謝安之出禮  
堂清閼詩境蕭閑九夏平安二年延企鼎裊多福圖籍  
自娛書不盡意

復某明府書

代

疊奉手書敬銘心版猥蒙獎借彌覺馳惶比惟某官

朝廷人物代有賜書家世儒宗門多列戟南州冠冕豈  
有能先東觀圖書當無未見絳幄遞懸於錦石香火緣  
深銅章偏握於玉堂文章望峻理縣誰曾著譜理學風  
醇居官仍愛讀書文昌星照某行能無算結習未忘偶  
然緝柳編蒲未竟芟蕪刈楚求益肯同乎買菜嫌多笑  
比於咏葵藉披榛而采蘭宛吹糠而見米疥駝或謂全  
豹庸窺僭刻叢編昔嘗遴選高懸藻鑑早判妍媸求定  
去留卽俾刷印編璫截貝當存照乘之珍屑玉零金所

貴連城之寶兼收並蓄敢言學者山淵賞奇析疑宜賸  
古人糟粕目覽書懸而頓易雒陽紙貴而何妨專待衡  
裁伏祈鈞誨恪遵明示快覩新編循吏政聲慶門文福  
仍希霽照卽頌台安詞不宣備

丙辰補行大科代省中各憲請王鴻臚典試入簾  
啟

伏以五嶺全銷兵氣端正月圓九賓尤重賢才文昌星  
照度世備延年之藥瀕海材多登仙隨貫月之槎清卿  
望峻朗懸冰鑑遠導霓旌恭惟老先生大人慶衍槐陰  
祥徵花瑞紹青箱之學業名冠六朝嚴白簡之風裁職  
兼二府圖百城以勵俗色正芒寒臚萬國以宣風禮明  
樂備節移東省溥 綸綍之新恩 詔出中朝簡文章  
之司命 特旨丙辰八月補行乙卯大科錦石謳歆瓊  
臺林舞拾炎洲之翠羽貢滄海之明珠解劍戟以負琴

書釋弓刀以懷鉛槧士知敵愾陶鎔成韓范之才人賦  
同仇拂拭定管蕭之亞安危足寄肯教清獻之鄉居風  
度誰如或紹曲江之相業重熙累洽允宜名世同符古  
誼忠言預以得人相賀定踰梅嶺早進棘闈謹啟

丙辰補行大科代省中各憲請張侍御典試入簾  
啟

伏以拾遺補闕 朝廷尊典試之臣舉孝興廉嶺海慎  
掄才之事導璇源而倒三峽詞壯觀濤朝金闕而領衆  
星頌宜比月密張珊網遠迓珠旛恭惟老先生大人道  
出羲皇器原公輔 詔補亡於三篋家有賜書擬取鑑  
於千秋臺惟古鏡槐廳清祕仿平子之研京柏署威稜  
伋乖厓之鎮蜀值 昭代朝熙門穆適此邦塵靜波恬  
詔補大科 恩榮特簡魚龍跋浪鵬鶚排雲歡聲騰  
瀾瀨之波光喜氣矗樵湖之霞采揆文奮武時共贊夫



隆平糾謬繩愆士益勵夫名節龍編化遠威靈銷劍  
戟之光鳳藻銜新拔擢倍韜鈴之貴待完寶塔先緡千  
佛名經同咏霓裳合賦羣仙高會祇迎使節同進省闈  
謹啟

爲闔省人士請重建省闈上勞星階制府啟

竊以揆文奮武原當培植人材舉孝興廉實以陶甄士  
類闡揚 帝德端藉審時觀變之雅裁維繫民心宜復  
論秀書升之鉅典恭惟督憲大人東南保障風雅總持  
台輔星明文昌宿耀韓忠獻垂紳正笏寶寄安危諸葛  
相羽扇綸巾獨知謹慎詩書禮樂望重華戎智勇功名  
癖耽圖史我粵東頻遭兵燹不乏賢才戎幕猶張省闈  
盡圯慨自戊午正科以迄庚申 恩榜猶然攘擾均緩  
舉行十郡喏然五年虛度補從浹歲尙記丙辰喜值今  
茲又屆辛酉慶膠庠之遞廣久業芸編冀瑣院之重修

旋登桂籍齊心同願業遲兩度公車彈指可成安得萬  
間廣廈某等望同癸鶴集比飛鵲情各羨魚智猶待兔  
幸榆枌之若故冀棫樸之咸歌實理亂之攸關業太  
平之有象特聯名而上瀆定從欲而脩俞卽拜封章降  
九重之明旨遍移文告俾闔省之週知將及百名迴  
殊舊額卽從八月仍復大科倘蒙次第補牢戴恩尤渥  
尙俟艱難集腋需用原多人思舊貫因仍地記昔年辛  
苦闢建章之門戶營新豐之里閭前度曾來臆見兔葵  
燕麥知誰典試仍栽野橘秋荷期書千佛名經鐵門有  
限擬合羣仙高會丹室先開經營如蟻穴蜂窠材具有

鸞臺鳳閣然犀照久當令塵靜波恬祭饌文傳漸致山  
彝海晏造從平地愈見莊嚴合似浮圖倍徵功德戰場  
非古不徒精銳三千衛國所知豈獨孤寒八百魚龍將  
化仍須得地而飛騰麟鳳不如倘賀得人之祥瑞天下  
之文章在是桴鼓不鳴嶺南之氣運何如衣冠原盛

爲粵閩省人士請增建號舍上各大憲啟

竊以 熙朝特典海隅之雨露偏多 帝者旁求寒賤

之風塵可念遞增孝秀益知 文治之休明仍主故常

恆慮賢才之遺佚恭惟憲臺材兼揆奮樂譜中和風雅

總持文章司命蠻防險要詳李德裕之畫圖時彥姓名

具呂許公之夾袋陶甄士類演迤斯文我粵東貢院號

舍擴建於道光癸卯之歲增脩於咸豐辛酉之年合連

番再四所經營實八千六百有餘號渥遭 九禁恩醲

業富賢書之選一贊聲雋迭邀 明旨之加中式孔繁

主文彌慎屬內均蒙廣額鋪中何所容身游壁沼者接

踵摩肩拓風簷者掀髯束手錄遺謝客索補沿街屢編  
窮篋之蓬須啖胡麻之飯筆牀茶竈土銚油鐙各各防  
虞年年警惕仍無隙地俾足儲材黃榜相期鐵門遽限  
匪隔蓬山弱水宛然遼海秋風良可慨已孝廉船覓人  
盡張憑夫子牆高誰匪武叔

某等

苦筍之味深諳甘棠

之陰共憩仰體憐才之意當賡薦士之詩竊嘗度地兩  
三定說買鄰千萬犬牙相錯虎落能防牆屋聿脩竟街  
兼巷明秋七八月敢誤試期拓號三千餘畧舉成數多  
多益善請箸難籌一一瞭然按圖易索用敢聯名而上  
瀆倘蒙同願而俯俞仍待布金卽當斧木功德無量勝

造七級之浮圖寒單各懽奚止萬間之廣廈風高翩迅  
水闊鱗舒慶似登天方誰縮地別開丹室萃楞嚴十種  
之仙旋入玉堂闢錦繡萬花之谷騫騰無自緣尺木以  
能飛朕兆何憑似榜花而彌豔如新豐之改邑閭巷依  
然如臨淮之偏師旌微不變南海盛衣冠之氣瑣闥直  
儼乎 北都南園仍翰墨之香祕府舊躋於東壁

爲闔省人士請添設房官上各憲啟

竊以重熙累洽舉孝秀以同增碩學高才慶陶甄而漸  
富掄才綦重校藝宜精疾原異於看花益迴殊於買菜  
珠衡誰握珊瑚網同搜專司諒極精能分校仍當整暇我  
粵東歷科省試恪遵成憲房官舊止十員業荷俯俞號  
舍增逾萬數下雙管以仍畧披萬籤而靡遑俯仰如神  
豪芒易忒擘求拂拭猥言五色之迷遴選去留仍恐千  
慮之失恭惟憲臺雷雨經綸山河容納某等辨慚菽麥  
誼切榆枌竊嘗錄四川省所奏聞仿添衆房考而闔卷  
外簾稱是多士彌欣津梁不疲璣鏡同耀昨承鈞諭倘



合機宜卽上達於 中朝仍靡越乎殘臘慧似黃華絳  
樹亦均畀其賢勞吟成野橘秋荷殆各精於衡鑒三千  
牘之文史足用上第褒然十三房之壇坫斬新戰場非  
古加彭祖者萃其力仍煩蒞艾之心虔爲浮圖者合其  
尖休訝發棠之請復

爲闔邑人士上朱柳溪明府請重刊邑志暨續修  
啟

昔楚炬旣焚鄮侯特收圖籍韓瀧始賦退之先問圖經  
我南海邑志脩始於庚寅刻完於癸巳堂開學海閣貯  
文瀾竟作劫灰詎留餘燼幸值我柳溪先生老父臺大  
人良能準的風雅典裁攷獻徵文脩廢舉墜<sub>某</sub>等材同  
壽櫟蔭藉甘棠合桑梓以聯名喜榆枌之如舊忍令鄉  
邦掌故悉付榛蕪擬將流輩弄藏重付梨棗並苦心於  
蓮茹握槩懷鉛畫依樣之葫蘆重規疊矩倏更四載誰  
無復刻之思將屆卅年宜有續修之舉敢求椽筆著望

夙詔乎揚班願捧珠槃尋盟忍遺乎曹許統祈俞允俟  
訂章程仍懇主持待籌費用珍此一鱗片甲頓還五采  
之觀飾以屑玉零金彌增百寶之貴因陋就簡竊非韓  
汝慶康對山之書抱缺守殘免如李吉甫王象之所撰  
李壽朋所特譔創任石湖黃才伯之曩編補煩夢菊謹  
啟

代闔省紳士爲潘德畚廉訪伍紫垣觀察請脩赤

岡琶洲雨文塔啓

竊聞五嶺北來城郭開而自固兩江東下浮圖鎮而始  
完本極莊嚴竟煩締造喜得人而並任諒守土所樂聞  
我粵省會城隔河赤岡琶洲雨文塔經營均始於明代  
形勝實關乎省垣水複山重民安吏恪嗣重脩于雍正  
恰相符而大魁頃妨漸圯第擬彌縫仔肩頻勸樂輸彈  
指烏能湧現迭張戎幕已毀相輪費定不敷事旋中止  
恭逢列憲大人琴鶴如仙香花禱佛耕推漁讓邑誦塗  
歌有在籍紳士按察使銜卽選道潘某道銜卽選郎中

伍某桑梓情同梅檀供辦欽拊循乎百國期保障乎三城助百廢之俱興請一如其所懇崛起有狀元宰輔不徒繼軌于昔賢所推皆正士端人何必借材於異地所有脩塔經費皆潘某伍某兩人捐出董事者卽委知縣徐序經敎諭黃元章訓導譚瑩等三人無庸另派委員一切工程公舉紳士督辦豈煩他及姓名預許同傳旣合其尖功德共知無量

代潘德畚廉訪伍紫垣觀察請同脩赤岡琶洲兩

文塔啓

竊聞水落扶胥原藉江山之助坡新翠堵彌增門戶之  
雄形勝所存經營敢緩我粵東會城隔江赤岡琶洲兩  
文塔後先創建於前明輦衛實闕乎全粵玉山珠海毓  
秀鍾靈蕉埤桃林蜚英騰寶嗣以兼年累載上兩旁風  
雖極莊嚴業經剝落重脩屢議苦集腋而未完有識交  
推屬仔肩而竝任幸他列憲大人法雨醴霑福星普照  
某等棠陰久憇原當補缺拾遺檀施已多復籍捐贏斤  
羨竊同所願宜早慶其落成伏冀俯俞更無煩於攸助

所有經費約七千餘金皆某等兩人捐出一切工程同  
舉公正紳士徐序經黃元章譚瑩等三人督辦何人望  
氣獨說鼇峰異日題名依然雁塔復兩重之保障僅爲  
科名造七級之浮圖敢論功德

代闔省紳士爲潘德畚觀察請增脩省闈號舍並  
脩學署考棚啓

竊以論秀書升首重衡才之地急公好義羣欽樂善之  
人功豈易於兼營事茲難于並舉無勞集腋有識傾心  
欣逢三載之期喜愜萬問之願我粵東貢院號舍阮儀  
徵特使重脩怡總制會議添設嗣以島夷不靖幕府同  
開養士非迂緩之圖駐兵實權宜之計不無頽壞實甚  
荒涼理前說則虛願彌哂其太奢及他圖則餘力均疑  
其不逮蓋廣州學使署考棚歲月綿曖風霜凋零糜朽  
可知欹傾足慮某等銜石有心布金無術一舉原期於



兩得此時轉覺其萬難屢約勸捐當釋警投鋒之始更  
防貽誤是興廉舉孝之年乃番禺在籍按察司銜卽選  
道潘某迭同商榷務使十全尙費經營慨然獨任是皆  
列憲大人功德雲垂文昌星照乞如所請俾觀厥成圖  
先繪以傳觀錢未輸而感嘆負大舟者需其力反令我  
輩慙惶爲浮圖者合其尖獨廬昔年辛苦魚龍將化曲  
成造士之心龜鑑誰如預賀得人之瑞

代潘德畚觀察請增脩省闈號舍竝脩學署考棚

啓

竊以文事不緩於武功院考實先乎省試國家大比  
尤重孝廉嶺海多材倍憐遺佚我粵東貢院號舍壬午  
共慶脩完庚子原思增建嗣以籌海連年事旋停止屯  
兵此地計本權宜易致毀傷實多傾圯今者幸際承  
平亟當營繕仍理擴充之說兼籌作養所宜廣州學使  
署考棚兼年累載難稽卜築之時上雨旁風當體憐才  
之意勸捐攸賴屢集紳賢應試有期難稽時日況值列  
憲大人求賢孔亟說士同甘有萬間廣廈之心獨片玉

崑山之寶某記曾投足願獨仔肩業先繪圖不復計值  
仰邀洞鑒期尅日而俯俞竊采鄉評冀得人而共理董  
事請卽委教諭黃元章曾銘勲訓導譚瑩等三人佖見  
才如方朔益勵三千奏牘之能羣推德愈贊皇獨增八  
百孤寒之感

爲闔省紳士請修赤岡塔上列憲啟

竊以錦石英靈重鎮實須環衛素爲聚落隔河仍與毗連殆全粵之所關三城保障與琶洲而並峙兩地莊嚴黃木灣空俾梯航之共懾六榕塔古如鎖鑰之相需旗鼓麾幢河山鞏固帆檣樓櫓烟雨合離此赤岡一塔所由昉乎爾其創自前明迄乎 聖代魚龍百變蟒玉千春樓敞合江亭猶浴日笠簷蓑袂翠羽文螺寺寺鐘魚村村農圃憶重修於道光甲辰二月惜遽毀於同治丁卯九秋屢令輸將敢言興葺幸值陶劉勳閩羊杜威名五管清怡百廢具舉竊冀於本年合捐增建貢院號舍

羨餘存項許撥銀四千兩俾成盛典旋復壯觀棖桷一新煙霞萬古永原同於淨慧登獨豔乎慈恩觀十郡之森羅作重溟之控禦湧現或來千佛獅海波恬威靈同祀六侯虎門塵靖溯五仙之聿至原盛衣冠造七級而歸然伊誰功德坡老本前身奎宿合供寶陀扶胥有海日神山聯登丹地

賀翁常熟師相內召還 朝啟

竊以元聖袞衣夙致鴻飛之慕召公主瓚宜賡虎拜之  
詩爲唐室之隆平天生李晟實匈奴所敬憚人比王商  
恭惟師相一代宗臣

三朝元老狀元宰輔辭翰一家廊廟封疆勲勞千古乃  
以明農夙願耕野如初巖擬退思園名獨樂琴尊東壘  
侍謝文靖而無由鎖鑰北門匪寇萊公而不可茲以中  
原多故絕徼騷然特沛 恩綸仍端揆席潞公復相宋  
廷備敬老之儀文正重來遼后敕開邊之慎范希文之  
責任後樂先憂諸葛相之生平集思廣益天下安如磐

石依然正笏垂紳斯人出慰蒼生亦但斜簪散幘蕭曹

在位甄陶皆絳灌之才房杜籌邊轉移息中外之擾佇

見將皆馮鄧臣多岳韓如明鎬之破貝州若李愬之平

淮蔡比王文成之馭衆如戚少保之練兵以人事君朝

野相慶

堂

槐市生徒橘園吏隱遠聞

朝旨兼聽塗歌

走難學乎馬牛賀聊同於燕雀將痛飲以酬佳節 聖

朝之雨露原多卜餘年定見 太平舊宅之山河不改

時江南陷  
賊已久

向大澤名山而默禱幸皇天后土之式臨原

官官宮妾所未知是走卒兒童所共識肅求渠誨遙頌

鈞安無任愉快欣忭之至謹奉啟事以聞

約粵中耆宿重陽日海山仙館讌集啟

代廖鹿儕

觀察作

唐白樂天致仕居洛與胡杲吉旼等諸賢作香山九老會焉至宋則潞公年德社結耆英涑水生平約彌真率後先輝映今昔流聞已某等遂初久賦慶壽先慙信人生之古稀實老民之多幸業辭蟬而捨冕仍載鶴而攜琴願與耆賢樂偕談讌思古人而竊愧仿良會而畢然茲謹擬於重陽令節同集潘園署曰海山仙館者也三城以西半塘以外洲鄰拾翠序笑題糕荷葉裹飯以彌香荔支釀酒而剛熟菊花環水橘樹經霜定論丹竈因



緣卽喜酒田供奉郡原羊石廳事更繪乎仙人宴比龍  
山官閤迴異於蠻府富鄭公均同值會勿送酒而不來  
王宣徽旣願寓名先裁詩而必至賤繒商訂笠屐迎延  
攜錢誰訝阮脩腰笛人如李委清閑有味惟此時然壽  
考不忘何者是客浮生止消半日佳話足豔千秋鐘萬  
旂常敢謂嵎瞻堂比琴尊書畫居然履道坊如敢笑李  
文正之宴嬉雅懷非遂或用狄祕書之故事晚進同班  
林木翳如佳日原宜觴詠衣冠甚偉後人眞作畫圖孝  
廉年踰七十者均宜與斯會殆湓元豐之數足媿會昌  
之賢某啟

約同人重修梁藥亭先生墓兼營祀典公啟

國初梁藥亭先生 熙朝老宿海嶠英靈早厯文林晚  
躋翰苑主騷壇於南裔結吟社於西園偕德曜以幽居  
芙蓉繞谷佳隨如之舊里叢桂留人盛德絕倫逸才曠  
代生同屈鄺友訂盟心來有王朱君能抗手不愧三大  
家之目憐江左之盛名殆綜十先生之傳洵嶺隅之間  
氣溯曲紅而接軫齊獨漉以揚鑣韓蘇獨此正宗馮黎  
均其嗣嚮墓在廣州北門外若干里訶子嶺葬同士行  
卜有眠牛陵比江都過輒下馬蘭芬玉穎碑版屹然月  
死珠傷簪裾逝矣幾至忽諸之嘆庸安逝者之心委奉

嘗於破廟附供養於叢祠考旋葬於康熙五十年辛卯  
憶曾修於道光元年辛巳駸駸霜露悽戀烟霞牧笛樵  
謳殤魂鬼火笑要離之徒近知太傅之爲誰絕異巢由  
買山有約並無忠武伐墓公然王孫安知葬令爲乎長  
樂將軍乃故訟難恃乎安生亟當刊醉吟之碑修謫仙  
之祀重爲斲石專待布金蘭茝告虔松楸無恙佛有華  
嚴之劫君非冥漠之倫亦後死之因緣盡真靈之位業  
所望捐贏斥羨欣助慨然庶使繼往開來英華靡絕或  
謀隙地另闢詩龕卽許丁卯之莊鑄賈閬仙之像青霞  
廟近白雪樓高迭奏神弦仍復社事昔者白楊作柱尙

書之冢全非今茲秋菊薦馨水仙之祠一例植花酌酒  
較何點以彌殷種萋萋獲甄傳張瓊兮孔易臺登得月壺  
觴同謁文溪軒紹抗風領袖原如典籍定媿未陽墓碣  
過者題詩倘有徵君祭田阿蒙作記

戴文節眷屬抵粵約同人伙助公啟

代

一代精忠當問廉頗之後全家羈旅忍同任昉之交期  
擲米以成丹如採花而釀蜜卽比邱成分宅仍祈魯肅  
指囷管幼安幾遶海無家趙伯陽殆英雄所保我戴文  
節師學綜三才識窮兩戒用兼文武氣壯河山還山本  
仲若之素懷蹈海實魯連之夙願翕然鄉望偏摧保障  
於東南竟作水仙僅寄英靈於苕霅哲嗣保卿茂才昆  
仲等學離家之王粲如賃廡之梁鴻冀桓郁仍作太常  
知鮑昱復爲司隸比徐家之四皓才操不羣來粵嶠之  
三城文史足用然而青鞵布襪冷炙殘杯孀幼關河田

廬兵燹油鐙土銚况味可知經卷繩牀遷流靡定某等  
忝列門牆夙欽堂構賦招魂而未學幸繼踵之孔繁誰  
憐避地之伶俜竊欲補天之缺憾茲游或遂獨飽何心  
各篤摯以輸錢或殷勤而賚米拔一毛而不可集千腋  
而乃成感德思賢捐贏斥羨諒齊心而同願勿袖手以  
旁觀陶通明暫學移居傳脩期終將殺賊雖袁安高卧  
素未干人而漢代相沿談先舉主豈必杜陵廣廈得庇  
清寒迴殊長者祇園敢論功德餽兼金而不受緣無聞  
戒之辭餉一飯而難忘謂罄酬知之事某等謹啟

梁教授雲門先生遺像贊

希賢希聖非惠非夷陳元龍百尺之樓黃叔度千頃之陂氣體高妙有過人者風流儒雅殆亦吾師不因人熱何用田爲歐九讀書子固能詩陶徵士顏延年之誄郭有道蔡伯喈之碑

新建兩廣節署上梁文

羊鉅平之出鎮鈴閣翛然李贊皇之籌邊畫樓詳悉園  
能獨樂亭費精思猥言締造之艱彌見轉移之妙人思  
召伯所憩甘棠將譽條侯定軍細柳綜核至木屑竹頭  
之瓌陶侃材優措置若泰山磐石之安韓琦望峻我制  
府辛階尙書勞大人遺大投艱集思廣益揆文奮武後  
樂先憂合駐內城兼因別廨範圍不過擒縱能操經營  
則都護府先威重而橫衝隊肅靈洲望氣獨占南海衣  
冠遼使知名合寄北門鎖鑰驛曾籌筆鎮撫奚宜園特  
布金莊嚴湧現森然兵衛遙控百城不下堂階洞見萬



里笑廣州之廳事但繪仙人軼方帥之堂皇合名元老  
飲惟杯水去定投香惜到分陰來先運甓臨淮久任微  
幟精明武惠元勳圖籍寶貴霍去病未營私宅李藥師  
儼若長城羽扇綸巾素屏檀几時和歲稔兼營喜雨之  
亭偉烈豐功兆畫凌煙之閣書誰暇枕包拯風裁碑擬  
先刊廣平惠愛今者瞻溥原而啟宇斷隆棟以需材停  
汝斧斤俟余謠頌賀惟燕雀拜有夔龍百堵皆興八州  
兼督覆姓名而

命相莫比金甌銘勲績而靖蠻標如銅柱知韋皋之鎮  
蜀丞相復生祝郭令之興唐諸彝羅拜集傳經濟移營

看八寨之平謨預贊襄望

闕賀三苗之格

重建廣州城南三大忠祠暨南園前後十先生抗

風軒募疏

從古興亡詎乏忠蓋或激昂陷陣或悲憤投江或馳惶  
納肝或倉猝斷脰植綱常於淪喪通盼嚮於幽微享祀  
不忒宜已若乃朔南一轍臣僕千春相期百折以不回  
竊比三仁而彌慘殘山剩水誰問奈何之天金盃玉魚  
嚼然乾淨之士仙掖殉波臣而去鬼雄知獄吏之尊業  
箕尾之各騎兆香頭而待斲著黃襪而無媿咏霓裳而  
喜同

文陸二公與謝疊山  
同舉寶祐四年進士

貞節苦心成仁取義履潔含

忠之素流風餘韻之存焚楮奠椒烏容已已嘗竊謂宋

室三忠之烈洵足增吾粵五管之光者也畧殊江右惟

祀二山

文山  
疊山

遙望厓門屹然雙廟左有抗風軒爲前明

前後十先生壇坫舊址并廟祀焉迭脩社事信買鄰居

萃海嶠之英靈益忠良之涕淚異劉郎之懷古敢說降

幡如宋玉之招魂各工楚些牙旗玉帳颿馬雲車粥鼓

齋魚筆牀茶竈閩中十才子或許聯鑣嶺南三大家均

其嗣響禮簪裾於異代總槃敦於三城理學名標英雄

事去擷新綠之田薤供晚香之寺花黃蝴蝶之飛來錦

鷓鴣之啼徹此欽賢之靈宇亦徵雅之麗區也言時稱

代曾錄打碑累載兼年誰賡考室茲以同治丁卯夏四

月烈風陡作零雨綿濛棟折榱崩石爛瓦碎業垣墉之  
盡圯卽坊表而靡存兩地毗連一朝零落丹楹舊容螻  
蟻玉座時走伊威堂皇埃燕香火間寂誰訪議郎之宅  
雪意微茫似閏正則之祠灘聲嗚咽載懷興茸僉議捐  
輸志士幽人夙怨嗟其際會媼機嫠緯亦布施以錙銖  
卹發局銀舊  
於此給發勿行不捨之檀巧藉能炊之米現莊嚴於

空際各有因緣肅名教於海隅原關風化伋見棉紅榕  
碧句有紗籠蕉黃荔丹鼓亦銅範菩提新種訪訶林而  
先拜仲翔柏樹倘存咏闕宮而彌思葛相太平宰輔辦  
香兼風度之樓正命君臣仙馭謁慈元之殿抗疏埒文

溪之直營廟同時鐫名仿炎漢之遺出錢咸列此亦表  
忠之觀端明作碑煥然大雅之堂浮邱復社

重修廣州府學宮碑文

代

竊以天雨洗兵中外盼五雲之符瑞 帝星燭漢東南  
仍六氣之經綸海隅之聲教煥然天下之文章孰大宅  
疑聞樂壁宛藏書夫子牆高原推美富聖人居近足庇  
寒單覩車服之完如游闕里被絃歌之化合仿武城已  
維我廣州府學宮前代鼎建 熙朝益隆人才獨儒林  
文苑之間地脈盡師海王山之勝議郎著撰傳經遠紹  
儒宗清獻風裁抗疏誰如相度獨豔科名盛事得月臺  
高特存騷雅正聲抗風軒古情殷觀禮至若舞乎風雩  
杜集題衡山縣文宣王廟聲徧讀書氣足壓乎戎馬迺  
新堂呈陸宰若舞風雩至

值丙辰以後戊午而還海水羣飛戎氛不靖與時升降  
從道隆污芻狗筌蹄兔葵燕麥擘經治事安定曷以名  
齋學道愛人滅明豈當由徑固都人士所同慨實守土  
者所深憂也夫外攘必本於內修文事實先於武備斯  
文未喪至道不凝昔答問陳於衛靈輒云俎豆嘗聞軍  
旅未學矧已鉤河摘洛旋乾轉坤造物無言 太平有  
象 神武不殺靈光歸然允宜合漠通微修廢舉墜恪  
遵 朝憲兼奉藩維所有大成殿兩廡以暨崇聖祠等  
處均俾營葺經始於咸豐十一年冬某月日計費金錢  
共若干豈彈指而卽成布金誰吝可仔肩而獨任斧木



仍先咸與維新優乎如見環林壁沼刻桷丹楹書庫琴  
亭筆牀茶竈合兵農而講禮樂華商風移開宮殿而拜  
冕旒帝王道備賸爵先賢之廟薦馨名宦之祠微顯聞  
幽報功崇德禮也一殊俗於鄒魯異微辭於定哀夾谷  
幽蘭靈壇文杏淵泉時出溥博如斯日月代明容光必  
照階除槐柳筐筥蘋蘩珪組章逢經書笙磬蜚聲延閣  
七門同翰墨之林望氣寶陀五管盛衣冠之藪某材非  
鮑德化豈文翁受經奏功乎上庠礱石誌喜於橫舍地  
遠原同益部堂銘煩王勃之才代興屑比唐初廟記  
慙虞監之筆風味可如陸宰倘致杜拾遺之高歌品題

誰藉荊州仍俟王侍中而屬藁

重修西湖書院碑記

會城書院曰粵秀曰越華端溪齊列嶽麓同符各大憲  
延山長遞年按月定期仍各校藝焉程月川侍郎師含  
章守廣州復汰珠江併羊石礮城勝曰羊城分內外院  
焉與兩大書院參煥乎其有至矣蔑加西湖之脩似可  
畧緩而不知泰華並峙而天台雁宕名區也江漢同流  
而彭蠡洞庭巨浸也厲風霜之操美箭叢生因造化之  
功長松分蔭且也近月泉之香火里寶金華話雲澗之  
仙靈竈祈丹藥像設禮虔清獻壁沼龕存風騷開始端  
明寶陀臺臨曾南城於訶林淨社廟祀功曹翁文端實

紅豆替人祠供周子加以阮太傅儀徵師相元督粵於  
王山之麓闢學海堂焉大菩薩總持風雅小瑯嬛夙富  
儲藏天地經緯有開必先日月光華大文彌耀脩廢舉  
墜良時在茲西湖書院舊爲南海義學雍正癸卯宋明  
府瑋捐建庚戌劉明府庶捐脩嘉慶癸亥康茂園方伯  
基田撥庫閒款榜今名者霜雪載零風雨如晦書庫半  
圯堂皇埃蕪窗竹不改而共憐庭花未知而還發油燈  
土鏗覺重席之靡安刻桷丹楹支環堵以將壓合邑紳  
士馮侶笙州牧錫鏞徐佩韋明府台英等眷言興葺苦  
勸捐輸彌年布金尅日斧水杜拾遺之志願履鮮萬間

胡翼之之生徒齋聯兩輩任陳蕃於一室安事埽除如  
釋迦之五城頓令湧現物無所棄咸與維新誰曰不宜  
悉同所願敢擬鄭鄉通德居然魯殿靈光廓崇基拓餘  
址繞廊載酒隔牖寫經新宮或銘舊井誰卜經始於戊  
申春某月日落成於庚戌冬某月日糜白銀共六千餘  
兩洵盛典矣新豐閭巷夫子門牆職志備書無勞覩縷  
齊頌鰲飛鳥革頓賡雀角鼠牙誰許問津未妨讓畔獄  
乃興乎文字疊殆肇於錢刀羽扇米船南箕貝錦抄同  
瓜蔓彈徧甘蕉誰作捲堂之文永戒爭墩之誚又值甲  
寅丁巳海氛轉熾寇難頻興歲歲懸軍人人避地梁鴻

賃廡范蠡移家幸檀橋之宛然惜槐市之竟輟邇來嶺

海昇平閭閻安樂武城寇退復聞弦歌之聲衡山堂存

宜有篇什之撰漫無碑版泚筆作記又安敢辭矧復值

三湖創改兩序聿脩

謂菊坡精舍暨應元書院

我都人士藏脩息游

學問思辨權輿此地演迪斯文霧涌雲蒸風行電照賡

莫宣卿朝聽殘漏擬姜公輔海照白雲張鎮孫坊勒狀

頭倫迂罔家傳鼎甲惟此時然易之而已抑更有請者

尉佗答牋伊誰屬稿楊孚抗疏匪獨能文功德茂而言

倍尊才學裕而識尤貴陳臨行誼高固材能若董正以

通經似黃恭而續志文襄文敏之官閭相業當直媲乎

曲紅海雪海日之詩歌宗風能遠紹乎太白仰企千秋  
作者翕然五管通儒庶登大雅之堂永立翹材之館都  
人士勉乎哉堂老矣無能爲役語曰行之維艱良滋愧  
已馬鞍厠接魚藻門開人皆文苑儒林地迺珠湄錦石  
採花橋在忠介坊留五仙之廳事非倫千佛之閣名容  
埒天下之文章莫大獨誇翰藻於西園靈洲之氣象歸  
然彌盛衣冠於南裔

重修南海節孝祠碑記

嗟乎茫茫此恨輪轉幾旋更誰知漆室之悲從古重柏  
舟之作衛無丹穴懷清而帝合築臺殉比金華行義則  
帥當立廟加以亮節高於尋陋不僅三貞清芬萃於灘  
江庶足千古宛麻姑之得道並錦石以題坊才操不羣  
後先輝映已我南海節孝祠遷轉沿革志乘詳焉夫以  
播種鬪歌采茶知禮圖肇鑑繡法華恪守閨箴夙嫻壺  
教內言不出姆訓綦嚴土風清嘉鄉俗篤摯倘遭逢之  
不偶若尋恆而各安心迹皦然死生度外帖梅花而比  
潔樹護草以忘憂分去同別鶴離鸞載閱春鷓秋蟀夫



猶皇甫婦比桓嫠已海氛胥平百廢具舉載懷興葺彌  
慎詳求卜芳鄰構靈宇仙人館在夫子牆高珠湄水清  
照劉氏之雙闕黃陵廟似獨湘靈之二妃扶植彝常述  
宣陰化崇禮序薦芳馨宜矣斧木設主香播栴檀鬱金  
名堂材美松栝庭靡血漬繡礎闢七星之巖殿有魂歸  
靈風埒大廟之峽賚 絲綸於九禁掄狄不如同香火  
於一龕玉魚安問海枯石爛生平皆空谷幽蘭地老天  
荒供養止寒泉秋菊經始於壬戌同治改元某月日卽  
以是年某月日落成時設局脩志布金者衆特撥銀二  
千餘兩拓地重建此祠住香界以脩然與玉山而不朽

已或送往事居俯仰無憾或興滅繼絕始終不愴或丹  
轂文軒或青裙縞袂或激昂而伏劍或隆貴以稱觴或  
蕙歎芝焚或柏悅松茂或初婚而輒寡或未嫁以于歸  
疇曩同符存歿一轍謹奉原祀若干人暨道光丁未並  
厯年遞請彙旌部議准以迄今志所書者共若干人合  
祀焉禮也使儷雅荷堂廟名氏翳如詎滋碧薜巖扉經  
過題徧倘或蒐羅未及神祇亦詔其來歆依然甄錄持  
平延訪勿疑其稍濫聖所居其未遠域總莊嚴縣有祭  
而必膳饌彌香淨辭慚幼婦定憑文字流傳香爇女兒  
窈見精靈來去明璫翠羽露筋之祠廟儼然月地雲階

墮淚之碑碣仍泐

覃恩誥授通奉大夫一品封典 晉授榮祿大夫  
布政使銜候選道紫垣伍公神道碑文

公諱崇曜字良輔號紫垣廣州南海人也曾祖章蕃祖  
國瑩俱 晉榮祿大夫父秉鑑候選道布政使銜 晉  
榮祿大夫生七子公行五母陳氏生母魯氏俱 晉一  
品夫人惟公生有異稟夙擅英姿古誼忠肝清襟勝託  
光華城闕感召風雷讀等身之書勤焮掌之業年十三  
補博士弟子員受知於潞河白小山大冢宰人間來去  
驚園令之文章天下安危原小范之責任常熟翁文端  
師相尤擊賞焉旋食廩餼援例就職教諭傳衣鉢所深

期故事諒符於文素載圖書而漫與遺韻殆比乎鄭虔  
已嗣以捐修波子角等處基圍 欽賜舉人一體會試  
萬家私祝三輔壯游輪蹄四巡巾卷五載羣推有道况  
偕元禮以同舟爭覓張憑詎預丹陽之末座譜鬱輪袍  
而誰屑囊焦尾琴而輒還時尊人諾重千金言通百國  
總梯航於壤末獨保障乎嶺隅金友玉昆伯歌季舞慶  
基有纂靈光歸然材邁等倫道匡雅俗門業獨荷儀望  
俱華辛丑之役島夷構釁繳鷲粟而靡罄破虎門而直  
前便抵五羊能如獨鶴烽隨星落舵逐潮高戈船早移  
鈴閣晝掩鄭公却虜同議金縉范句知兵先夷井竈卒

使盟堅刑馬饗悅椎牛日本不矜月支仍斬己酉之役  
進城期屆卻敵謀先將豈王罷人如劇孟小杜罪言不  
徒原衛孟嘉蠻語何必參軍洞悉機宜切中要害詎令  
石勒長嘯東門大似魯連偃然西帝險迴殊於劍閣孟  
陽勒銘棄倍甚於珠厓君房議奏界猶銅柱圍宛鐵山  
遂使郾班門倣征稅依然尉佗城高譏嫌不事教煩移  
市論卽徙戎知者鮮矣丙辰丁巳之役戎氛轉熾邊釁  
復開埃火雲烽礮艦蓋舳舨金枷其誰信劃玉斧而敢  
違晦明先請箸而籌泣涕道彎弓而射亦見轉圜之妙  
用懸知棄甲而復來寇讐者業與連和款附者當令間

謀曹罔有言王綱弛而復張諸侯傲而復肅會同四譯  
中外一家屢相商榷而乃兒戲業同於霸上將心實狃  
於蒲騷竟至偪處未已焦爛爲期三城闐然九服多難  
餐氊蘇武嗟此別其安之贈策繞朝惜吾謀之不用亦  
可以悽愴傷心者矣夫佐漢六奇唯曲逆侯而能決和  
戎五利本魏莊子所夙知豈爲九世而復讐原異三邊  
之接壤厥後中朝大議良將密謀略同一揆所以柏雨  
田勞辛階兩制府均倚重公焉擒縱誰操指揮能定轉  
移無術灑熱血而容辭談笑自如罄苦心而莫諒張儀  
舌在燭武精亡補造化而無功心太平而有象椎連環

而定解舞如意而能豪此輩非孝子順孫此地亦仙宸  
帝所虎負嵎而竟去魚縱壑而不還龍性難馴鴟音漸  
革籌邊樓在懷遠驛存人有捉刀民安秉耒實使單于  
朝漢兼憚王商回鶻尊唐仍拜郭令此亦公之功也歲  
在甲寅紅巾肇亂白鷺誰導青犢何多驟起分江幾連  
闔省雁翅之城早閉馬鞍之岡復靈吮血磨牙抽腸墮  
膽星營露閣箭火矍灰時葉漢陽師相攘袂而起同心  
合謀忠武目以可人條侯詡以敵國山川險要士馬精  
良刑賞平反部署先後節樓文案籤室機宜周爰諮詢  
知人則哲北門鎖鑰寇平仲原鎮定之才南國干戈崔



正子有澄清之錄材如昭諫屑唱饒歌客異馬周能知  
封事居近西園地連北郭榆枌在望草木皆兵特募土  
團之軍俾禦僧騰之客八橋塵靜雙井波恬鄰火村春  
酒旗歌板張曲紅之作答間藉飛奴馬新息之定邊仍  
騎款段原如卜式久越王丹備邊之庫使空勞軍之錢  
獨任糜子仲上金銀貨幣匱困不虞符彥卿獻錦綵資  
糧聲威乃振惟知奉國豈以釋疑卽至毀家業先紓難  
且也金陵水戰遠辦艤艫神京穀倉藉富儲待裕極  
邊之賞賚並及逋亡卹鄰省之凶饑復經兵燹况乃委  
司分局殆十餘年頻勸樂輸仍數百萬捐贏斤羨乃防

匿戶藏丁置腹推心奚事徵村切里驟稅之名飛錢之  
入殆創聞矣

天子褒之恩私稠疊候選道加布政使銜 晉榮祿大  
夫給予一品封典 賞戴花翎中年之心力交瘁金版  
懷珍極品之頭銜遞加紫薇進秩獎談兵於戎府親灑

丹毫憶奉使於江南曾持玉節金孔雀之 殊錫石

麒麟之誕生

公以庚申  
始得孫

六院琴書一門簪紱殆所宜已

嗟嗟庭膀 玉詔

帝稱忠義之家臣本布衣身繫興亡之局倫黨稱孝固  
知蠻貊之可行婦稚懷恩第說英雄之所保猶憶西關

人士議構生祠委作幃語而公均力辭

望

所親見所以

若蔡中郎之撰碑原無媿色哭馬少監而誌墓別有餘  
哀已其他穆行罄竹難書如我素交種花當許公生於  
嘉慶庚午年二月初五日酉時卒於同治癸亥年十月  
二十二日亥時年五十有四卽以同治癸亥年十二月  
初一日葬於大北門外金錢嶺之原禮也妻許氏 晉  
封一品夫人妾芮氏梁氏俱 封恭人子紹棠 欽賜  
舉人 賞加四品銜候選郎中 賞戴花翎孫璟文謫  
文嗚呼手無斧柯龜山宛在墓有宿草鴻波不興地老  
天荒乾清坤謚終將穿冢擬近要離曾未上墳真慙范

式我猶孺子奠時仍具炙雞陵比江都過者咸思下馬  
待建屈左徒之廟詣復招魂宛然羊鉅平之碑讀當墮  
淚乃作銘曰

胥山祥符蠻海氛靖杕杜誰歌荏苒迭警民夷構禍里  
郇需賢託緣謹慎役笑遷延一劍論兵萬金酬士將令  
如山臣心似水偏如陸賈迴異何真撫戎剿寇裕國甯  
人職匪領軍誰容避地遐邇翕然東南重寄周生謬謬  
郭憲觥觥忠言逆耳贊普渝盟五嶺有光退之驅鱷七  
門如舊令威化鶴還理故業乃閱重局述文敘勲垂光  
作靈

覃恩晉榮祿大夫紫垣伍公墓誌銘

瑩

既作紫垣伍公羨道之文其哲嗣復以壙中之銘請

竊疑勒分兩石獨范傳正之碑銘製自二王

湘東邵陵

惟裴

子野之墓誌倘乖前式貽誚重規已然謂交誼特深生平盡悉殆孝子慈孫之深意實通人達者所交推祕籍蒐羅諄囑讐校衡鑒不爽鉛槧實多上足補金匱石室之遺亡次亦供墨莊書庫之瀏覽述作同例是即可傳馨香所藏畢世結習辭不獲已仍屬稿焉詳露版者不復贅公諱崇曜字良輔號紫垣廣州南海人也曾祖章蕃祖國瑩俱晉榮祿大夫父秉鑑候選道布政使銜

晉榮祿大夫生七子公行五母陳氏生母魯氏俱

晉一品夫人惟公辰象精靈僧伽福德對嫺初月才豔  
落霞碧雞金馬之詞章鳴鶴士龍之譽望返議郎之第  
宅朔雪當飛學仲舉之門庭纖塵亦掃以劉琨之傷亂  
容孫綽之遂初繫社稷之安危前身青兕作鄉閭之保  
障遠徼金鷲踰繡襦之年華恪遵庭誥住烏衣之門巷  
藉甚鄉評實使危帽散衣間街淨盡明珠翠羽合市依  
然益在維桑謙猶大樹客非蓮府人擬菊坡職志當書  
無煩臚述若夫縹囊紺帙玉軸牙籤夙富儲藏輒同甄  
錄猶憶命酒春明之宅徵歌野史之亭相與推求本原

是正得失搜尋異本購訪原書咨嗟三篋之亡珍重一  
瓶之借誤仍思讀缺亦傳鈔編摩卅年審定各部抱殘  
守匱提要鉤元最樂蕭閒還往宛開吟社總持風雅後  
先同付手民况當浹歲撫夷彌年助國合千村而盪寇  
定五管而籌兵不可企已嘗輯粵雅堂叢書初編二編  
三編書凡一百八十種刻焉該而特要博而不繁儷左  
禹錫學海之編軼陶南村說郛之輯以視 國朝琴川  
毛子晉鄔鎮鮑廷博殆如驂之靳也又嘗輯嶺南遺書  
第一集第二集第三集第四集第五集第六集書共六  
十二種粵十三家集書共十三種楚庭耆舊遺詩前集

後集續集書共七十六卷均刻焉鄉邦論撰海嶠英靈  
博采兼收芟蕪刈楚良金美玉截貝編璫闡幽顯微懷  
舊思古以視前明黃才伯張孟奇區啟圖 國朝馮司  
馬溫舍人羅太學劉編修淩茂才等各鄉先輩所撰求  
屑同於買菜用殆比於積薪已至校刻宋王象之輿地  
紀勝共書二百卷則又錢竹汀宮詹訪求而始獲阮文  
達師相畱貽而僅存者也原 四庫所未收合三本以  
重訂神物之呵護已久故家之藏度略殊苦爲分明參  
互考證詎畱餘憾洵屬鉅觀也近又自吳門購得 國  
朝海鹽張月霄 金吾 所撰金文最原稿書共一百二十



卷備完顏之掌故緣鉅手所嗟稱

阮文達暨李中書均有序

未覩琬

鐫俄驚玉折公業繕寫足本剞劂未竣而乃永憶逝水  
同歸道山良可痛惜哲嗣繼繼鴻緒樂觀厥成仍議開  
雕卽廣流佈且復篤志墳典鳩閱彙編更請他題殆卜  
延慶卽公遺著吉光片羽賸粉零金亦擬同刊免令放  
失信斯文之未喪而盛業其不朽者乎公年十三補博  
士弟子員旋食廩餼 欽賜舉人候選道加布政使銜  
賞戴花翎給予頭品封典生於嘉慶庚午年二月初  
五日酉時卒於同治癸亥年十月二十二日亥時年五  
十有四卽以其年十二月初一日酉時葬於廣州大北

門外金錢嶺之原娶許氏 晉封一品夫人妾芮氏梁氏俱 封恭人子紹棠 欽賜舉人 賞加四品銜候選郎中 賞戴花翎孫璟文諱文嗟嗟天下之文章莫大嶺隅之文獻誰徵一品集同一坏土在沈碑不事決征南之永傳題墓有詩似拾遺而能記嗚呼復誰知我久輟伯牙之絃幸有替人當續叔皮之史大星竟隕今雨仍來聞鄰笛而後悲檢楹書而竊慰羽陵之藏不蠹鏤本咸珍趙州之土同澆買絲欲繡殘陽柳葉明月梨花須堯典以同棺宛法華之在手墳隧羅拜夢衣冠交錯乎古今陵谷寂然與卷軸長畱於天地千春事業亦

吳札之劍臺萬丈光芒卽劉蛻之文冢復作銘曰

望峻華戎趣耽文籍延閣徽猷名山心迹延資異裕汲  
古功深南庫文囿西園墨林白玉樓局丹砂井改震疊  
七洲盱衡千載表彰前哲撰著殘編懸同機鏡錄豈雲  
煙容納山河森羅星斗沾漑後來釐定誰苟征蠻綏寇  
橫海銷兵策高匡贊惠洽儒生秋菊春蘭謨觴位置玉  
樹長埋瑯嬛福地闡揚道素演迪人文鎮心編嗜瑣骨  
餘芬記總依稀垂當永久龜著載言梨棗同壽提攜語  
默殘缺凋零力迴造化德被幽冥阿士才名小坡寄託  
四部全刊九原可作威斗篆古漆燈闇然玉棺竟下書

樂志堂文續集卷二

墓誌銘

李

香永延

公祭南園前後十先生祝文

飛雪宅淪抗風軒蠹東粵詩亡南園社復三唐派接二  
獻祠同人聯十友地邇三忠律判古今輩分前後秀冠  
江東聲騰嶺右詩仙陟降佛地清華前明七子 昭代  
三家穆若清風森羅列宿書畫琴尊鼎彝登豆緒闡浮  
邱美擅訶林我曹嗣響詩境聯吟海嶠騷壇春秋社日  
五管英靈寸心得失紅棉開落白藕芳馨綿千萬禩禮  
十先生

程月川侍郎師崇祀粵東名宦公祭祝文

通儒廉吏良帥重臣諸葛名士文成替人敷歷卅年經  
濟一集中牟魯恭桐鄉朱邑理縣開府裕國憂邊士風  
橫塾水利梯田陶侃清忠宋璟遺愛澤切去思風高前  
載佗城輿誦潞水客談計闕天下祀延嶺南

祭盧后山制府文

代

嗚呼哀哉功存鐘萬像繪丹青難留冬日忽墜晨星沈  
碑城闕輟耒郊扁高才昔擅思舊誰銘觥觥我公篤生  
畿輔學究天人材兼文武捫蝨猛談聞雞遯舞向擢甲  
科政參戎府鎮定誰如澄清可覩材儼侃宏望齊羊杜  
揚舲鄂渚擁節中州齊知革俗河頌安流湘中翹切山  
右遮留星營霧閣緩帶輕裘樽彝帝賜犀象江投北  
地居憂西郵梗化羽檄方馳墨綬能謝轉饒軍饒羸糧  
敵訝填谷委山輦車轆駕億庾斯豐壺漿迭迂特晉宮  
僚寵延世職孔雀分華珊瑚儷色望峻中朝威加絕域

西土旣平南邦是式酌泉自勵運甃誰知復銘銅柱竟  
廢珠池華夷震疊江漢謳思齋中酒易從事書貽登樓  
或坐連榻誰嗤慶惟士女歌有童兒蠢爾逆搖囂然  
盛世楚粵毗連兵民提制兩地綏懷孤軍鞏衛封豕革  
心連雞失勢犴鳥蠻花蛇妖蠶蠱蕉卑枕林茅烟箐雨  
大將麾幢中軍旗鼓一道周知三年鎮撫重來嶺外實  
總師干德洋恩溥色正芒寒遠夷桀黠互市仍安彌年  
旱潦饑殍誰看山明海晏永塵凋殘家無跼蹐野絕探  
丸文傳驅鱷集訂驂鸞水涸長河峯頽靈嶽檣幹風凋  
松鱗霜剝箕尾空濛河山綿邈慘對銘旌悽聞畫角曳



杖安歸焚香曾覺嗚呼哀哉處極脂膏守如廉吏拔盡  
寒單人幾債帥蠻貨不傳越裝誰寄珮玦定捐弓刀無  
異嗚呼哀哉某等夙荷陶甄彌增悽咽內相威名長離  
永訣孫楚言哀羊曇涕咽清酒維馨嘉肴既潔音響聞  
如英靈未滅嗚呼哀哉尙饗